

欽定大清會典事例卷二百七十六

戶部

蠲恤貸粟一

貸粟○康熙三十年

諭山西平陽府岳陽等八州縣被災人民將五臺崞縣
儲米借給○又覆准山西省平陽府聞喜等十五縣
被災將太原大同二府屬買存捐米借給○三
十一年覆准山東省存儲捐穀二十八萬九千
餘石酌量借給窮民接濟春耕○又覆准山西
省聞喜等縣捐項將竣饑民日增飭各州縣將

分儲米價。借給窮民。○又覆准。陝西省西鳳二府屬疊遭荒旱。動支州縣捐銀借給。以為籽種之用。○三十五年

諭直屬寶坻等州縣被水。今年錢糧業已免徵。無可蠲恤。該撫責成賢能地方官。確查實係窮民借支倉米。務令均霑實惠。不致流離失所。○三十八年覆准。直隸省贊皇縣。向因土賊為害。居民逃避。今漸歸鄉里。失業已久。資生無術。暫動倉糧借給牛種籽粒。○四十一年覆准。將西甯運送西安糧米。借給本地窮民。○又覆准。山東省海豐等州縣

被水。於積儲糴三存七米穀。借糴並行。以濟窮民。○四十三年覆准。將

盛京所存米穀。酌量借給打牲烏喇人戶。○又覆准。河南省現存倉穀。每年將一半存倉備賑。一半借給窮民。○四十五年題准。近京州縣米價漸昂。已將常平倉米穀動十分之三減糴。其有實在窮民無力買米者。亦於三分之一酌量借給。○四十七年題准。河南省各州縣常平倉存儲米穀。每年以三分之一出陳易新。令將新儲倉穀。亦照常平倉之例。不必限定借數。

隨民便借給。六十年覆准。直隸省大名府長垣等四州縣。因黃沁水溢。秋禾被淹。貧民乏食。該州縣將存倉米穀借給。如有不敷。於截留漕米內動支。又貸黑龍江被災之兵丁水手人等口糧。又覆准。陝西。甘肅二省。五十九年夏秋被災。今值春耕。撥解庫銀二十萬兩。借給籽種。雍正三年。貸山東省被水之曹魚臺二縣常平倉穀。又覆准。直省州縣。遇借給民糧之時。有貧乏兵丁需借米穀者。該管官詳報督撫。一面報部。一面批行該州縣查驗得實。取具該

管官弁印領借給。○又議准。出借米穀。務令各州縣官按名面給。秋熟之後。按戶繳還。若胥吏蒙混捏名虛領。追欠無著。將捏領之胥吏從重治罪。其所欠米穀。即於該州縣官名下追還。並照失察例治罪。○七年題准。廣東省潮州城守饒平。平鎮三營。照例於青黃不接時。將買存倉穀借給窮兵。○八年題准。陝西省西安府及直隸省蔚州。被旱被雹。居民乏食。動用存倉社穀。蔚州並動用存儲晉省兵米。酌量借給。○乾隆

二年

諭各省出借倉穀。於秋後還倉時。有每石加息穀一斗之例。如地方本非歉歲。循例出陳易新。則應照例加息。若值歉收之年。國家方賑恤之不遑。非平時貸穀者可比。至還倉時。止應完納正穀。不應令其加息。將此永著為例。○三年題准廣東省各屬民借社倉米穀。概行停止加息。豐收之年。每石加耗三升。如遇收成稍歉。即將應加耗穀。一併免其交倉。○又議准各省出借倉穀。仍照舊例分別年歲豐歉。收息免息。至廣東福建等省向不收息者。令照舊辦理。○四年議准出借米穀除被災州縣

毋庸收息外。如收成九分十分及收成八分者。仍照舊每石收息穀一斗。其收成五分六分七分者。免其加息。○又議准。出借米穀。如本年收成五分者。緩至來年秋後徵還。收成六分者。本年先還一半。次年徵還一半。收成七分者。本年秋後免息徵還。收成八分九分十分者。本年秋後加息還倉。○五年議准。各省夏月閒或有得雨稍遲。布種較晚。必需接濟者。酌借籽種口糧。秋後免息還倉。○六年

諭。自上冬及新正以來。直隸山東山西河南陝西五省

陸續奏報。均得瑞雪。春日載陽。土膏滋潤。播種不可後時。著五省督撫轉飭有司。勸導小民努力東作。其有貧乏之家。籽種不足者。量為借助。○七年

諭上江鳳潁泗三屬連年被潦。民困為甚。著將三屬已賑貧民。再借予口糧一月。其正月止賑之處。去來秋尚遠。最貧之民。借予口糧兩月。至五分災不賑者。定例於春月酌借口糧。統於秋成還倉。若近處米穀不敷。由遠處撥運。恐緩不濟急。即照例用銀折借。○又覆准江蘇省所屬之江浦六合山陽阜甯清河桃源安東淮安大河興化銅山沛蕭邳宿遷睢

甯海洮陽共十八州縣衛。雨雹水溢。傷損二麥秧苗。除興化一縣外。其餘各州縣衛。皆係上年被水之後。平民補種秋禾。俱屬艱難。應於常平倉項下。或動米穀。或動糶價。借給籽種口糧。所借倉糧。秋成免息還倉。○又題准。安徽省鳳陽臨淮等州縣衛被淹地畝。將來涸出。貧民不能自備麥種。於附近豫省購買二麥。借給百姓。俟豐收之後。分兩年交還。○又

諭江南被災之後。著有司勸諭災民。愛護耕牛。官借給草價以資牧養。○八年

諭江南淮揚徐鳳潁泗等五府一州。上年水災甚重。兵丁食用艱難。准在司庫借支一季餉銀。於今年分作四季扣還。今朕聞各省糧價漸增。若再扣還借項。則食用更苦。著將前借一季餉銀。緩至本年秋成後散給冬餉時扣起。作四季扣還。○九年題准四川省甯甯縣被水不及十分之四。勘不成災。毋庸議賑。於來歲青黃不接之時。酌借倉穀。以紓民力。○又奏准四川省西昌縣被水各戶。暨瀘甯被雹各戶。均借給倉穀。秋後免息還倉。至南江縣屬被雹各戶所借倉穀。俟來歲秋後免息還倉。○

十年題准。江南省鳳臺、潁上、蒙城三縣被雹。在常平倉內借給貧民口糧籽種。如倉穀不敷。即動銀折借。○又奏准。直隸省慶雲縣地瘠民貧。被災之後。耕牛甚少。應給銀三千兩。令天津府知府委官前赴張家口採買耕牛。送交慶雲縣散給無力貧民。田多者。每戶給予一牛。田少者。兩三戶共給一牛。俾得盡力南畝。廣行播種。○十一年議准。陝西省西安、榆林、葭等州縣。每歲糶三穀內。除出借給外。其餘糧米儘數出糶。交價府庫。以為次年借給出口種地窮民牛具之

需。○又

諭直隸鹽山慶雲甯津三縣。原屬上年災重之地。先經借給籽種口糧。此時想已告匱。著照大小戶口再借口糧一月。以資接濟。按畝借給籽種粟米四升。以資耕作。○十三年

諭山東萊州府屬之高密平度膠昌邑即墨五州縣。當積歉之後。本年復被水災。民間耕牛不敷犁種。若不豫為籌畫。更恐坐誤春耕。著照乾隆十年直隸慶雲等縣之例。於東省庫貯本年賑濟用贖銀內動撥購買耕牛賞給。俾小民力作有資。以示惠濟窮黎之意。

○十六年

諭今歲浙省被旱成災。米糧昂貴。著加恩將浙省被災各標協營綠旗兵丁。每名借給米二石。俟各省協濟米運到。及截有漕米之日。該督撫分次借給。於十七十八兩年內扣餉歸款。○又

諭。朕因浙省甯紹等屬歉收米貴。曾降旨將被災各標協營兵借給米糧。以資接濟。念該省今年旱災稍重。各屬米糧一例昂貴。著再加恩將浙江通省兵丁每名借給一季餉銀。於司庫內動項借給。俟明年夏季後。分作四季扣還。○又題准。江南省壽宿遷等州縣

衛。乾隆二四六七八九等年原借籽種口糧牛
草。計未完米穀等項三萬六千二百五十三石
五斗五升。銀九萬六千六百四十七兩九錢五
分各有奇。內應催還米麥等項共一千五百九
十八石三斗八升。銀一千一百八十七兩一分
各有奇。實欠米麥等項三萬四千六百五十五
石一斗六升。銀九萬五千四百六十兩九錢三
分各有奇。實在無力完繳。應准豁免。○十七年
奏准。各省被災貧民。借給籽種口糧。夏災借給
者。於秋後免息還倉。秋災借給者。於次年麥熟

後免息還倉。均扣限一年。自十七年為始。扣限造報。以昭畫一。○二十三年

諭。各省倉儲。向例春借秋還。貧民既得資其接濟。而秋收後。即照數徵收穀石。可以出陳易新。至次年又可查覈待借貧戶。再行借給。若不如期催領完納。而以舊欠作新領。則出借之項。年復一年。不肖胥役從中影射。日久遂致無著。大非慎重儲積賑恤困乏之意。嗣後各督撫務當實力奉行。除緩徵州縣外。所有民欠倉穀。令依限還倉。○又

諭。山西太原保德等府州屬連歲災歉。民間已鮮蓋藏。

著再酌給兩月口糧。○二十四年

諭。甘肅去冬未得透雪。現在東作方興。各屬內有不能及時耕種者。俱借籽種牛具。折價給予。務俾農民早事南畝。以冀有秋。○又

諭。陝省榆延等屬。去秋未經被災州縣。二麥歉收之處。准照例酌借籽種口糧。○又

諭。甘省附近土司所屬地方。上年被有偏災。著加恩借給口糧三月。分作三年交還。○又

諭。直隸固安等州縣。所有被水村莊。著查明按畝酌借倉穀。俾得更換籽種。○又

諭甘省各屬災地應借籽種口糧著加恩河西每石折借銀一兩四錢河東每石折借銀一兩三錢俾農民耕作有資。二十五年

諭甘省上年夏田秋禾俱被偏災著加恩酌借籽種口糧俾得耕作。二十八年

諭直屬州縣上年秋霖被災較重深堪軫念地畝雖經涸出閭閻或無力播種著查明有可趕種春麥或候種大田者均分別借給籽種。二十九年

諭黃梅等處因江水漲溢民田廬舍不無漫漫其被災稍輕之處借給口糧籽種以資接濟。三十四年